

# WAKITÀ UWANA POL ATSETSÈR À TITUS Lettre de Paul à Tite

## *Ayyi*

<sup>1</sup> Gi Pol, la uwana gətsetser wakità uwanay, gi mayà aña Zəzagəla, ɲgaha gi masla matapla la slaka Yesu Kristu. Zəzagəla aslèl gi, kà gi aña mazəɲ azladza, uwana Zəzagəla adatsatsamani atà, kà atà aña madiɲ gəl à masla à vok, ɲgaha tatapla dziriga kà mapəhanula maday, uwana akəs à Zəzagəla à gəl. <sup>2</sup> Gəɖfahəɲ kiya uwanay kà, kà azladza aña masəlay kà atà la sifa adəv à gay aw la Zəzagəla, uwana adəh fida aw. Amiyaka gudəɲ à vok kà adadzəka vok dadəɲ, à uwana Zəzagəla apəh gay aña sifa uwaga à azladza à ahəɲ aw. <sup>3</sup> La kaslà uwana anəts à ahəɲ, apəhanula sifa uwaga, uwana la gay aɲha la abà. Zəzagəla uwana masla maβəl anu, afà à gi gay uwaga à ahəl, afà à gi à gəl, kà gi aña matapla à azladza.

<sup>4</sup> Gətsetseray kà à kak Titus, kà uwana kagay kà bokuba kak bəzi huf gulo, kà uwana anu səla nna mədiɲaw gəl à Yesu Kristu à vok. Zəzagəla Baba, la Yesu Kristu, uwana aβəl anu, tapis à ka gay à vok la mav à ka lapiya.

## *Sləray uwana Titus adəhəɲ la Kəreta*

<sup>5</sup> Gəsakà ka la Kəreta la gudəɲ uwana la tataka iyaw la abà, kà kak aña madəhəh azlatatak

uwana talög madàhàh vok à ahəŋ la tetəvi aŋha. Nğaha kà kak aŋa matsatsamani azlamasiga, kà atà aŋa magay məna manəŋla məna gay Zəzagəla, la kəla huɖ gudəŋ gesina, bokuba, uwana gətəpkala.

*Uwa à uwana azlayla kà magay masiga uwa?*

<sup>6</sup> Dza uwana kakəsani kà magay masiga kà, say agay zil gày, uwana taslèhàla vok aw, agay zil aŋa mis tekula, azlabəza aŋha tagay azlaməna madiŋ gəl à Yesu Kristu à vok, maday aŋatà agay delga kà azladza aŋa manərəz atà, tadàh mawisiga aw, nğaha tagay azlaməna makəs gay aŋa azlababa aŋatà koksikoksi. <sup>7</sup> Masiga aŋa azlaməna gay Zəzagəla kà mayà aŋa Zəzagəla. Kiya uwaga kà, say agay kokudà mawisiga tetuwa. Agay zlapay aw, agay masla ləv aw, agay masla guzu aw, agay masla mayàh gay aw, nğaha bay, agay masla mawoy sili aw. <sup>8</sup> Ama agay kà masla makəs azlaməlok dza la ahàl səla, awoyaŋ kà madàh azlatatak delga pəra, aga masla maslèh vok à vok aŋha agay dzirirga, aga dza aŋa Zəzagəla lela, aga masla mabasiŋ. <sup>9</sup> Say adàh haŋkəli la gay marabəŋ, uwana mətapla à azladza. Baŋa afehəŋ kiya uwanay kà, adàbəz tetəvi kà matapla gay uwaga à azladza anik, nğaha adàdzərəɖah atà à uda la gay uwaga babay. Nğaha adàpahla ala la paraka, kà azlaməna maf gasa à gay marabəŋ à gəl kà, azlayla atà aw.

<sup>10</sup> Bək azlamasiga à ahəŋ kiya uwaga, kà uwana azladza aŋuvaw tadàdzadzaŋah gəl ala, koksikoksi tapəhay kà azlatatak uwana takəs vok

aw, tavavar azladza babay. Azlauwana tadehəŋ kiya uwaga kà kaykay gà, kà tsəhay Yahudiya, uwana kadavàw vok à uda tagoɸ. <sup>11</sup> Delga kà, azlamasiga aŋa azlaməna gay Zəzagəla tadəɸ à atà gay à ahəŋ, kà aŋa matapla azlatatak uwaga à azladza aw, kà uwaga la uwana tawis huɸ gày aŋa azladza anik ala, la tatak uwana tatapla à azladza, tasla nəma aw, ama asa à atà maɸəz sili la tsəhay matapla ziruwi gà uwaga. <sup>12</sup> Dza anik la ahəŋ, uwana zil gudəŋ Kəreta bokuba atà, apəh à ahəŋ uwarà, uwana adəpaka vok, apəh la paŋaw aŋha: ‘Koksikoksi azlaməna gudəŋ Kəreta tapahay kà fida, tasəl gəl aw, bokuba azlatatak fəta, azlaməna masa, tadzugw kà à huɸ aŋatà pəra.’ <sup>13</sup> Ndzer kà, gay uwanay kà dziriga, kiya uwaga kà, sləh à atà à vok la mapəh à atà à vok à abà lela, kà atà aŋa manəf tetəvi aŋa Zəzagəla lela. <sup>14</sup> Pəh à atà à vok à abà lela kà atà aŋa manəf azlagay deydayga aŋa azla Yahudiya, uwana tapahahay aw, ŋgaha tanəfa gay aŋa azladza uwana takweska dziriga aw. <sup>15</sup> Baŋa la ləv tsədaŋa la huma Zəzagəla, dèwdèw adagay sətaka kà aŋha. Ama kà aŋa azladza uwana la ləv səla, ŋgaha tadiŋ gəl à Zəzagəla à vok aw kà, tatak la ahəŋ sətaka kà aŋatà aw. Kà uwana atà kà tadzugway kà azlatatak mawisiga aŋa madehəŋ pəra, ziruwi aza à atà aw. <sup>16</sup> Tagoɸ la paraka kà: ‘Məsəl Zəzagəla’, ama tatak mawisiga uwana tadehəŋ apəhla ala, kà tasəl masla aw. Tadzadzəŋəh gəl aŋatà ala kaykay la azlamawisiga, taslala vok kà madehəŋ tatak delga aya aw.

## 2

*Kakay à sləray aŋa masla mapəh gay Zəzagəla ma?*

<sup>1</sup> Ama kà aŋak kà, kapəl à azladza kà tatak uwana akəs vok kà aŋa tetəvi aŋa Zəzagəla. <sup>2</sup> ‘Guzu akad’ akul aw’, gòd’ à azlamakoz zilga. ‘Dahàw tatak gesina kà la tetəvi aŋha, slèhàw vok à vok aŋkul, diŋàw gəl à Zəzagəla à vok lela, wòyàw azladza anik la ləv tekula, basàwwàŋ azlaŋgərpa koksikoksi!’ <sup>3</sup> Pèh à azlamakoz mis bokuba uwanay babay: ‘Dahàwwàŋ kà uwana la tetəvi aŋa Zəzagəla la tsəh lela. Kakalàhàw sləm aŋa azladza anik ala aw, kagaw azlamayà aŋa guzu aw, ŋgaha tapawla azladza anik, uwana akəs vok lela!’ <sup>4</sup> Baŋa tadəhəŋ kiya uwanay kà, tadàtapla azlaiyaw mis babay, kà mawoyəŋ azlazil aŋatà, la azlabəza aŋatà. <sup>5</sup> ŋgaha tatapla azlaiyaw mis uwaga, kà masləh vok à vok aŋatà, ŋgaha kà atà aŋa mazaḅ zil aw, ŋgaha tadəh sləray lela la hud’ gày aŋatà la madəhàh azlatatak delga, ŋgaha la makəs gay aŋa azlazil aŋatà. Baŋa tadəhàŋ kiya uwaga, azladza tadətuɡw mawisiga lakəl aŋa gay Zəzagəla aw.

<sup>6</sup> Pèh à azlabəza kohana kiya uwaga babay. Gòd’ à atà kà: ‘Slèhàw vok à vok aŋkul lela!’ <sup>7</sup> Gəpèh à ka babay kà kadəh tatak delga pəra, kà azlabəza kohana anik aŋa matapla tatak la uwaga la abà. Baŋa katapatàla tatak, tàpatàla la ləv tekula, kapah azlatatak deydayga aw. <sup>8</sup> Tàpatàla kà azlagay uwana tagəd’ à afik, dza aslala vok aŋa matsəḋfal gay à tsəh aw, ŋgaha kà azladza uwana asa à atà matuɡw à ka mawisiga

à vok kà, atà aña mabəz mawisiga la abà aw, ɲgaha ziruwi makəs atà.

<sup>9</sup> Kà aña azlamayà kà, gòd à atà kà: ‘Kèsàw gay aña azlaməɲga aɲkul koksikoksi, ɗahàwwàɲ kà uwana akəs azlaməɲga aɲkul à gəl, kabayaw vok gay akul nna aw. <sup>10</sup> ɲgaha babay kà, katsatsakw ahàl la azlatatak aɲkul la vok aw, ɗahàwwàɲ kà azlatatak delga pəra, kà azlaməɲga aɲkul aña masəlay kà akul azladza dziriga hadʔay’, pəh à atà. Baña azlamayà tafehəɲ kiya uwaga kà, azladza tadàsləkaw azlatatak uwana mətəpla à azladza lakəl aña Zəzagəla, masla mabəl anu.

<sup>11</sup> Delga kà azlaməna gay Zəzagəla tadàh uwanay gəpəh lagwa, kà uwana Zəzagəla adapəhla ala la paraka, kà vok mahamay aɲha à azladza gesina, kà masla aña mabəl atà. <sup>12</sup> Bà uwana Zəzagəla adadfehəɲ kiya uwanay kà, məsəl kà, mənəfa tetəvi mawisiga aya aw, mənəfa azlatatak aña gudəɲ à vok, uwana takəɗ à anu à adi aya aw. Uwaga kà mok uwana anu la gudəɲ la vok la uwana, məslala vok kà masləh vok à vok gami. Məɗaha uwana akəs vok, ɲgaha mənəfa tetəvi uwana akəs Zəzagəla à gəl. <sup>13</sup> Məɗahanəɲ kiya uwanay, kà maf gəl gami à mavakay uwana à afik, Yesu Kristu Sufəl gami adàzlanəlay la mazləbay aɲha, uwana adəpəhanula Yesu masla Sufəl Zəzagəla gami məɲga. <sup>14</sup> Avà gəl aɲha, aməts à slaka gami à abà, kà masla aña mapəlanula la tsakana la abà, ɲgaha kà masla aña magəɲ anu sətaka la huma aɲha, kiya uwaga kà anu aña magay azladza

aŋha, kà anu aŋa maɖàh azlatatak uwana delga koksikoksi.✧

<sup>15</sup> Tàpla à azladza azlatatak uwanay tadzərəɖahatàla, pèh à atà à vok à abà, kà uwana asa à atà matsənəŋ aw, pèh à atà la maslay uwana Zəzagəla avà à ka. Ayà kagod à azladza kà mapəsew ka aw.

### 3

#### *Maday delga aŋa masla maɖiŋal gəl à vok*

<sup>1</sup> Wulà à azlaməna gay Zəzagəla à gəl kà, takəs gay à azlasufəl la ahəl ala, la azlagumna aŋatà la maɖàh uwana tapəhatàla. Tawoya maɖàh azlatatak delga. <sup>2</sup> Gòɖ à atà babay kà tatsəɖ gay mawisiga à azladza à tsəh aw, tagazilla aw, taga tələmma, takəs gay à azladza anik la ahəl ala babay. <sup>3</sup> Pèh à atà kiya uwaga, kà uwana anu babay uwarà məga azlakusoŋu babay, məɖza-dzàŋàhà gəl gami ala. Tetəvi dziriga aŋa Zəzagəla azà anu à adi, kà uwana mətawàh kà maɖàh azlatatak mawisiga à tsəh pəra, mөгà kà azlamawisiga, tetuw tetuw məfàhà à adi à tatak aŋa azladza anik à tsəh. Azladza tapəsəwàh anu, ŋgaha anu babay məpəsəwàh atà suwaŋ. <sup>4</sup> Baməraka məɖàh kiya uwanay kà, kaslà anik, Zəzagəla uwana abəl anu, apəhla ala kà aɖàh delga à azladza, ŋgaha awoya anu kaykay. <sup>5</sup> Abəl anu kà deyday, awkà abəl anu kà kà sləray delga gami uwana məɖahàŋ aw, ama abəl anu kà, kà vok mahamay uwana akəs kà anu. Azəb

✧ **2:14** 2.14 2Musa 19.5; 5Musa 4.20; 7.6; 14.2; Mahabay 130.8

anu tsakana gami lakəl ala, adfahà uwaga kà la ndzəda aña Masasədok tsikasla, kiya uwaga mөгà mayyi vok mawga la mabəz sifa mawga. <sup>6</sup> Zəzagəla ahənanula pawaslwasl la Masasədok tsikasla, la ahəl aña Yesu Kristu uwana mabəl anu. <sup>7</sup> Adfahəŋ kiya uwaga kà, kà anu aña mabəz sifa, ŋgaha məsəl kà masla adàvə à anu sifa uwana adəv à gay aw, uwana apakà vok kiya uwanay kà, Zəzagəla adfahà delga, ŋgaha apakànula tsidəŋa la huma aŋha. <sup>8</sup> Gay uwanay gəpəh à ka, kà dziriga.

Ŋgaha asa à gi kà katapla à azladza uwaga koksikoksi, kà azlauwana tadiŋ gəl à Zəzagəla à vok makəs azlatatak delga uwanay. Gay uwana məpəhla ala kà dzəba aŋha səla aw, azlaka azladza babay. <sup>9</sup> Baŋa azladza tabay vok gay deydayga kà, kada à abà aw. Baŋa tapəhay lakəl aña azlababa madzidziga aña uwarà, kada à abà aw, kabay vok gay lakəl aña mapəhay aña Musa bay aw, kagazllaw akul nna aw, uwaga kà tatak kusoŋuga deyday gə pəra. <sup>10</sup> Baŋa dza atsalla mavəhla à tataka azlaməna gay Zəzagəla à abà kà, sləhal ala vok asik tekula, baŋa atsənà aw kà, kafal sləm aya aw, gòlla à lig à gay. <sup>11</sup> Kasəl kà azladza uwana tavəh azlaməna gay Zəzagəla ala kiya uwaga kà, atà kà, tasakà tetəvi mawisiga, tsakana aŋatà adəpəhla vok ala la paraka.

### *Ayyi makəf gəl à ahəŋ*

<sup>12</sup> Gədàsləl dza anik à slaka aŋkul, zlahaw Arətemas, baŋaw Tisik, à uwana gədàsləl à awtày. Baŋa adəbəzà à awtày kà, wədf wok à uda la katskats kà mad à mabəz gi wok la

Nikopoləs. Gədzugw kà, la təla awkusa kà, gədəday kà madz à ahəŋ la abatà. <sup>13</sup> Zlakà Senas masla masəl mapəhay, ŋgaha zlakà Apolos babay, və à atà tatak uwana akəs vok kà aŋa mauguzahay aŋatà uwana tadàday lagwa, kà atà aŋa manəkudfa aŋa tatak aw. <sup>14</sup> Azlauwana tadin gəl à Yesu à vok bokuba anu tasəlay babay, kà atà aŋa maɗaɗàh azlatatak dzəba aŋha səla aw gə uwaga kà, atà mazlakàh azlauwana la kudfa la abà. Baŋa tadehəŋ kiya uwaga kà, madz à ahəŋ aŋatà adàgay deyday aw.

<sup>15</sup> Azladza uwana anina la abanay, taɗfaha à ka: ‘Ayyi’ gesina. ‘Ayyi’, məgodɗ à azladedfa uwana tawoya anu la maɗiŋal gəl à vok la abà, ŋgaha vok mahamay aŋa Zəzagəla apis à akul à gay à vok gesina.

**Wakità Zəzagəla Wakitə Anja Makəs Vok  
Slawda Mawga (Cameroun)  
Matal: Wakitə Zəzagəla Wakitə Anja Makəs Vok  
Slawda Mawga (Cameroun) (New Testament)**

copyright © 2019 Wycliffe Bible Translators, Inc.

Language: (Matal)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 13 Jul 2024 from source files  
dated 29 Jan 2022

03efbf2f-98ca-5534-8610-0be3a8c4b974